

【一碗甜菜卵花湯】梁愛珠原作

十月冬下割忒禾後，天時漸漸轉涼了，也涼爽哩，阿姆个菜園肚，種當多蘿蔔仔、芥菜、大心菜、包心白、結頭菜、高麗菜。這兜菜一看就知收成後，準備年下仔孩擔去街項賣，有伸个晒乾愛入盞囤起來。這兜事頭全全係佢兜細人愛搵做个。菜園肚角頭角尾脣邊看得著另有種「甜菜」也有人講係香甜菜、皇帝菜。有一息仔清淡菊花香，這甜菜無論係用來煮湯、焗過滴兜油搵醬、淨炒，當清甜爽口，做得講係客家人最愛个風味。

菜園肚一大片个蘿蔔仔、芥菜好摘了，大人細仔背痠痠、頭磬磬仔一頭一頭擲，做到腰骨痠軟，一半下就想企直來伸一下腰骨，趕日頭花出來，蘿蔔仔洗淨剝埕禾埕項晒，芥菜吊等竹篙項晒，臨暗仔收轉用大醃缸滷鹹，用腳來躡，就變鹹菜續等過晒就係鹹菜乾、蘿蔔乾。一雙手一雙腳，因為同鹽水浸濕過久，十隻手指頭同腳脰，時時必開血漬漬仔，也愛刻耐仔搵手忍痛做，大人吩咐个事毋敢推，總講爺哀希望屋下過隻好豐年。

有一年冬下頭，堵著寒流來，濕漉漉个天時，這粗勞个事一年過一年，儕儕做到腰掛背吊，佢毋堵好嘎寒著，身體陣寒陣熱，發燒了，斯懶甥甥仔。該時莊下時行家家屋屋廳下，壁項都

有吊等一種成藥安著「家庭平安良藥」个藥包袋仔，袋仔肚有傷風感冒个、顧胃腸个、顧筋骨痠軟个、著傷貼个藥膏項項有，放藥包仔个人，每隻月定時會來換添藥仔，一個月算數一擺。阿母遽遽尋出一包退燒藥分佢食，過幾下日還係燒無退，燒到會燒人，歸身軟怠怠仔，該央時生活清苦，小病無出莊去街項看先生。

阿姆心肝掛吊到無結無煞，記得該日臨暗仔發風落雨，佢跔工著等水衣仔去菜園肚割甜菜轉來，煮一碗燒燒个「甜菜卵花湯」兜到眠床脣，扶等佢跔起來憑¹厥身邊，一湯匙一湯匙啗分佢食時，有一種清甜个味緒，過無幾久黏時潑²大汗，作燒漸漸仔就退忒了，佢知阿姆種个這甜菜摻雞卵係準備愛賣个，平常時毋盼得食，這下為著子女康健愛趕緊復原，爺哀惜子連心，仰般就有辦法。

想起頭擺農業時代，細人仔發病時節爺哀舂頭磕額尋草藥材，病症無起色時，正會去街肚尋先生看，爺哀就背囊背啊等三步做兩步趕緊行，窮苦到連一臺自行車就無。一碗簡單个「甜菜卵花湯」，心肝肚就裝淦淦个愛。難怪「甜菜」也有人講係皇帝菜。子女著病時有爺哀个服侍，佢兜做子女个有影就像小皇帝樣仔。

¹ 憑：音 ben；靠在某件東西上。

² 潑：音 pad；如水澆灑的，大量的、數量多的。

【耕種人个子女】陳米英原作

頭擺个生活，六月天公會噍薤菜就愛停動，正經係日日做到兩頭烏。

記得還細時節，阿爸食个頭路係鐵路局个道班工，也就係擎鐵鎚做鐵路个工人，逐日屋下先做一脩事再去上班，故所阿爸个手腳盡煞，不管做麼个事情都盡有煞氣，佢兜細人仔，乜無人敢推懶，尤其係緊工時節堵著風搓天，一時間愛喊無師父，屋下又無人好換工，乜喊無工人，全部就搶等愛收成自家个禾穀，若係慢咗一日半日，該橫到歸坪歸田坵个禾仔跔等生芽，一來無法度用機器收割，二來生芽个穀又賣無價數，大半年來个辛苦就分風搓搥到淨淨，正經係膝頭就會出目汁。該央時个莊下人較老實，無像今這下个耕田儕較有常識，會申請政府補助，在吾个印象中，輒常聽著阿爸、阿姆常透道嘆：「耕田人看天食飯，天係毋檢你食，做死乜無人賠」。斷真有影哦，難怪會有「人害人肥佢¹，天害人一把骨」个俗諺，這係天災，無奈何，佢人還係愛認命、順應天理。

想起頭擺，吾屋下个細人仔各有各个事愛做，細俀仔愛掌牛、割草；細妹仔愛掃地泥、洗衫褲、撿樵、晒穀。講著晒穀緊工時節，家家屋屋都愛自家晒穀，就算請人乜無人有閒搵手啊！屋下座大个阿姊全部嫁忒哩，伸著佢這講好聽安到「滿女仔」个就愛掙起晒穀个擔頭了，想著該甲零地个穀，全部愛用祛把，一祛把一祛把硬掃到淨，正經係手工个哦！這下想起該咬人个日頭，歸身汗流脈落，做到出油个樣仔，發夢都還會著驚哦！毋過牙根嚙等又乜過來了。

今這下無共樣了，在田坵肚機器行過去就搥到淨淨俐俐、好勢好勢，隨時載去農會交濕穀換現金，實在有方便。頭擺佢兜細人仔毋使爺哀講，該做个事情有頭有尾做到好好，讀書人讀書寫字係暗晡頭食飽夜个事，大人在坪下寮涼泡茶時，佢俵在廳下抑係灶下桌項寫，從來乜毋識無寫忒，第二朝晨還愛比人早到學校，想起讀小學該駁仔，係堵著落雨天，赤腳嫫踏，一領水衣布抵等，半行半走去學校，無鞋好著个日仔，回想起來，若毋堵好踏著蟲蟻，走頭無路驚到半生死，有時還會打激顫呢！在這時代有時講分學生仔聽，無人相信有哦！

時代一直在進步，生活乜一直改善，電子、電訊取代咗手工个日仔，頭擺艱難困苦食著毋好个日仔，練成佢這下賺食个本等，雖然賺無多，但最起碼个生活，毋使摻子女伸手乜過得日仔，永遠保留著客家人勤儉堅耐个精神。

¹ 肥佢佢：音 pi^ˇ dud[`] dud[`]；肥而扎實貌。

【屋下該扇壁】邱坤玉原作

佢從細歇竹籬茅屋，寒天勉勉仔做得防風，熱天做得抵涼避雨！

阿爸在日本人个會社肚，領著種甘蔗、改菜園、結石腳个頭路。當時分著一支鑊頭、一支擔竿同兩隻畚箕，就恁仔日合夜無閒做到兩頭烏。正式艱苦，日仔無恁簡單過——每日就恁認真做，但係領該毋成錢，過該食番薯籤擺米粒个日仔。生活都過毋得下去也，哪有辦法整出體面个屋場？好得還起得起一間蔗葉擺合个茅屋，做得起一座土磚个灶頭，一屋大細總算有地方做得跔，毋會打露！

茅屋个壁係用濫泥敷竹籬起起來个，難免會必縫。到寒天个時節冷風在必縫尖入來，冷颼颼仔實在冷到會死！到熱天个時節，該就鬆爽哪，望毋得佢鑽入來。

屋下該扇壁正對大門，係屋場最闊个壁，也係佢兜屋下最鬧熱个壁。該壁親像學校个公佈欄，掛等一個日本製个掛鐘，還有阿爸同阿姆結婚个相片，阿爸著等西裝、阿姆同等西式个白紗羅帕，阿姆明顯矮阿爸兩粒頭那，兩儕牽等手盡靚。

該扇壁也係佢兜屋下最光榮个壁。先用剪開个肥料袋仔貼等

做背景，過貼等大姊著洋裁个靚靚个日本婆仔，還有生到相貌堂堂个大哥哥同野狼 125 共下翕个相片，過有二阿哥去成功嶺受訓剃光頭个相片，還過有細姊在學校學煮菜時个笑容，生活中个紀錄全部貼在該扇壁項。

最光彩个係兄弟姊妹同自家領轉來个獎狀，貼做一排一排，該係最光榮个事情，大家就恁仔拚命仔在該領獎。該一排排个獎狀本旦係打拚來个光榮，告知阿姆講：「噃！用獎狀貼等，壁較毋會過風啊！」哈哈！害佢兜分阿姆撩到目汁都會跌下來，真係窮苦人家个辛酸啊。

當中有一張獎狀對佢一生影響盡大。係先生來屋下家庭訪問過後，校長先生頒个「環境衛生獎」，先生講雖然佢兜歇个係茅屋，毋過地泥掃到若金¹、茶杯茶盤搓到蓬白、壁項獎狀貼到齊齊，還有屋下頭前、左右兩百公尺都掃到淨淨，值得表揚。

在該時代，大家歇个屋全係茅屋，該確實係窮苦人个樣仔，空窿空殼，淨伸著壁項貼等个「獎狀」，該係一條生活下去个希望。係鼓勵窮苦人家个子女丟忒鑊頭、齧等牙根去讀書，讀出希望，爭取將來有機會坐橫桌，正有出頭天个機會。

三年水流東，三年水流西，隨等時間个推搡，運勢也會變化。歇也三十零年个茅屋，阿爸時來運轉興旺起來，就起也莊項第一間洋樓！

¹ 若金：音 na gim'；亮晶晶。

【細叔婆】李雪菱原作

還當細个時節歇在伙房項，記得伙房肚有當多人。大阿伯歇在上片，偈兜歇中央，細叔歇下片。就恁樣，偈兜細人仔每日就上片下片走上走下。

頭擺中央伙房歇大叔公同細叔公過偈兜共三房，細人仔盡多，叔伯兄弟愛掌牛，老弟不時跔佢兜去掌牛、釣蚬仔、覓蜆仔、拈田螺，無一項毋會，阿爸毋分佢跔，驚走去泗水仔，無大人在脣口當危險，係講忒暗轉來，分阿爸捉著，該就壞蹄咧，會嘍皮帶仔¹唷！

偈兜細妹人還細細仔，就愛自家暖水²洗身、洗衫褲、圍草結、煮飯、炙茶……，麼个都會。吾爸食頭路，屋下當早就無蒔禾仔，毋過，種盡多弓蕉，大出个時節，偈兜愛搵手，孩毋起就用扛个。

共房頭个細叔公當早就無忒哩，毋識看過，細叔婆生來細粒細粒，當會著藍衫，有烏色个、藍色个，著起來當好看。佢盡會在禾埕尾梳頭那毛，看起來當長當長个頭那毛，梳一轉兩轉，盤

¹ 嘍皮帶：音 sai' pi' dai；被皮帶打，被修理、責罰的意思。

² 暖水：音 non' sui；燒洗澡水。

上去用紅索仔編起來，再迂幾轉變做一粒饅頭，有時節會紮兩把盡靚个髻髻仔。偈兜幾個細阿妹仔當好坐在簷頭下看佢梳頭，看到昏昏哦！心肚恸：下二擺大吔乜愛像佢恁樣，著靚靚个藍衫同梳靚靚个髻髻。

係講屋下个大人去田坵做事个時節，細人仔同細叔婆共下留在屋下掌屋，大个渡細个，下把仔遠遠看著鷄婆个烏影飛來，細叔婆就拿雞祛在地泥項緊敲，雞嫵會咯嘞咯嘞緊喊，細雞子會遽遽走去雞嫵翼下園等，係走忒慢个，就會分鷄婆夾走，這下恸著還會心肝忒忒颯喔！

該下仔見擺堵著落雨天，細叔婆會喊偈這兜細妹仔遽遽量米拿去磨，轉來好做水版仔。過還會緊念：「一升在來米一升水，一半做甜个一半做鹹个，甜个愛攤黃糖，緊煮緊攪，攪勻倒落碗肚，七分滲就好，蒸二十分愛打開來用筷仔試看啊會黏米漿無，係毋會就食得吔。鹹个愛炒香料，蘿蔔乾、香菇、蔥頭切幼幼同蝦米共下焗香滴一息仔豆油就好勢吔。」聽細叔婆講到口涎波潑³，偈兜幾個人就做到攞手捋腳⁴。

老古人講：「一人有福，牽帶滿屋。」伙房肚有細叔婆，一生人都有講毋忒个生趣事，有笑、有噉，麼个事情都牽牽連連，偈兜實在有福！

³ 口涎波潑：音 heu' lan' bo' bad；形容人講話講得很賣力的樣子。

⁴ 攞手捋腳：音 lu' su' lod giog'；捲起衣袖拉起褲管。

【面仔】魏秋娥原作

民國五十年左右，在僱還細個時節，吾屋下歇在山肚，屋脣有兩大坵土地，一坵拿來種柑仔，另外一坵種番薯。該央時有人成功接枝一種新款个杻仔，逐頭樹仔打當結，逐隻杻仔又大又靚，咬起來脆脆又當有水，大家摺佢安到「月杻」，乜有人講做「四季杻」，在該時當時行種「月杻」，聽講做得賺盡多錢，故所阿爸摺全部个番薯田，改種「月杻」。柑仔摺「月杻」係屋下主要个收入，逐朝晨阿爸阿姆就會揸等果子去市場該搭仔賣，僱摺阿哥、阿姊乜會揸揸。

阿姆教僱兜面項該層定著愛擇外型較靚又勻大个果子，一隻一隻排到齊齊，僱俚客家話安到「面仔」，目的係愛分市場个水果販仔來割貨去賣，「面仔」排到越好看，屋下个果子就賣越多；若係排到毋順人客个意、看毋上眼，水果販仔該兜頭家、頭家娘毋肯摺僱俚割貨，僱兜就愛一斤一斤仔慢慢仔賣，成時賣到當晝還賣毋著二十斤。阿姆講：「做生理就係恁樣，牛眼核擰屎——看各人个本等，麼人个『面仔』較合水果販仔个意，分佢兜行兼來，正有機會請佢兜試食果子，僱俚屋下个果子正做得賣

淨淨。」

成下僱兜乜會幾斤仔幾兩仔零星賣，識堵著人客，用手指甲這搵一下，該搵¹一下，想試看杻仔有熟無？罇脆無？分人搵過个杻仔黏時多加幾點烏點，恁樣个杻仔就賣毋出咧；僱兜盡驚該專門擇「面仔」來搵个人客，因為分佢搵過个杻仔就變媠咧，賣出个價數較低，箱仔肚伸个杻仔就還較賣無價了！該揸肥擇瘦个人客，又好講價，講來講去，又買無幾多隻，阿姆總係當愁慮，試著自家無嘴碼當毋壁，講人毋贏，賣著恁少錢。

僱想著好辦法，僱摺杻仔切做一細坵一細坵，用鹽水拋一下，見看著人客就行前去請佢試食，僱細細聲講：「阿叔、阿姨，請你試食看哪！吾屋下个杻仔真脆、真甜又當有水，毋係就面頂个較大隻定定，籃仔肚个隻隻像僱肥肥大大，當好食喔！拜託你試食看哪！」市場肚來來去去个人客真實全部行兼來試食杻仔，買盡多杻仔轉去，又阿謔僱「恁得人惜」、「恁有嘴碼」、「恁會做生理」、「笑容恁甜」……，買過个人客加兩日仔又來交官，回頭客盡多，笑等問阿姆：「頭家娘，若屋下這隻『面仔』真靚真大隻！賣幾多錢？」緊講緊笑，阿姆講：「這隻『面仔』係天價，賣毋得！賣毋得！」

屋下个生理緊來緊好，阿姆講全部係吾个功勞，僱真實當暢！

¹ 搵：音 ziim；用指甲刺擊。

【黃杳阿婆】徐姿華原作

阿富叔公做里長三十零年咗，佢當熱心，逐日都會騎等厥該臺老奧多拜，滿哪巡巡看看，佢就像僱兜莊項个伯公，守顧這莊頭。阿富叔婆隨時都打扮到萋婁萋婁¹，佢會在耳公脣楔²兩蕊仔含笑花，同佢企較兼兜仔就會鼻著含笑花个香氣。莊肚个人感謝老里長服務大家恁用心，逐個都當敬重阿富叔公兩公婆。

阿富叔婆在屋脣種一頭含笑還過一頭土杳仔，逐日打早，佢愛去伯公下換神茶、燒香个時節，會摘幾蕊仔含笑去敬伯公；佢也當顧厥个杳仔樹，該頭土杳仔同現下个品種無共樣，土杳仔當硬，無異多肉，黃黃个杳仔心子又撈又硬，實在無當好食，毋過，頭擺無麼个零嗒好食，細人總係脰脰仔³看等該青溜溜个杳仔，一旦杳仔略略仔轉色，隨時都會分這兜細孬仔摘去食，一半下佢兜若係摘著忒青个，咬著還澀澀，將就就擲在杳仔樹下，阿富叔婆看著就會譴，一有細人仔俛來，佢會嗶嗶滾⁴緊唸：「恁孤盲！恁孤盲！杳仔吉好食就拿來摘，無採人个東西。」「這兜細人仔係無人教招係無？仰會恁無規矩？」細人仔聽著阿富叔婆緊罵，就毋敢過去偷摘杳仔食咧！

¹ 萋婁：音 qi' qiog'；光鮮亮麗。

² 楔：音 xiab'；塞在縫隙中，使之固定。

³ 脰脰仔：音 goi' iog' iog' e'；因為想吃，而流口水的樣子。

⁴ 嗶嗶滾：音 gau' gau' gun'；形容抱怨或不滿的聲音，多用於罵人。

無細人仔來耗爽⁵，幾個禮拜過，該頭杳仔樹打到結結結，樹頂个杳仔也對浸青⁶慢慢仔轉黃，遠遠都鼻得著黃杳仔該熟水⁷个香味，錫來枵鬼个細人仔，也錫來歸陣个蜂仔，飛上飛下。毋過，這兜細人仔，毋敢行忒兼，驚怕阿富叔婆又逐出來罵。聽著細人仔聲，阿富叔婆正經打開厥柵門行出來，手項擎等一支長長个撈仔，該兜細人仔一看啊著，發屎驚⁸斡頭起腳就走，嘴項還緊喊：「阿叔婆擎竹仔愛打人咧！阿叔婆愛打人咧！」阿富叔婆在細人背後大聲咻：「噯！細人仔啊！等下！莫走啊！」，該陣細人仔聽著，還較驚，瀉到無看著魂影。

第二日下晝，阿富叔婆攞等一袋杳仔，企在對學校愛轉莊肚个橋頭，等細人仔放學；細人仔陸續行到橋頭，阿富叔婆笑微微喊：「來啦！杳仔黃咧！做得食哩啲！」過拿出袋仔裡肚个杳仔愛送分細人仔食。正開始，逐儕你看佢、佢看你，麼人都毋敢拿，毋過厥手項香甜錫人个黃杳仔，像在同細人仔攞手个樣仔，又過一下仔，阿雄先行兼去拿來食，逐儕看著正敢去拿，兩下半歸袋个杳仔就分細人拿淨淨咧！

原來，阿富叔婆毋係驚人食，佢愛等厥杳仔黃咧正愛摘，正做得食著土杳仔盡好个味緒啊！對該擺起勢，莊肚个細人仔毋會再驚阿富叔婆咧，毋知哪個細人仔帶頭个，尾下逐個細人仔看著阿富叔婆做下親暱仔喊佢：「黃杳阿婆！」

⁵ 耗爽：音 ho' song'；糟蹋、耗費。

⁶ 浸青：音 jim qiang'；形容極青的樣子。

⁷ 熟水：音 xiug' sui'；瓜果長成至可收穫的程度。

⁸ 發屎驚：音 bod' sii' giang'；驚恐害怕。

【 偃心肝肚个客家味緒 】楊世玲原作

客家菜摻客家人共樣共樣，一個係重油重味、一個係重情重義；一個係鹹甜清楚、一個係恩怨分明，半點就無走正！

剁盤个雞鴨大體係自家屋下畜个頭牲，熟水過無注藥仔，專門食飯糝、菜蓋¹，罕得食飼料，故所皮又貴又油，肉又甜又香。自家做个橘醬，酸合香，滷兜仔豆油搵啊落去，阿姆哀！該舌嫵係無絹較纏兜仔，有影會嘎吞落肚屎去唷！還有該滷豬腳，豬腳剁到大嫵圈，滾水燻²啊過，正用細火燂分佢出油，蒜頭米愛掛等皮，敲敲啊放勢落，加兜豆油，色靚又鹹香，過來定著愛用全酒做毋得放水，共下去燴到皮韌肉酪，係驚攪攙會同蒜頭米摻豬肉皮舞到溜皮，就將該鑊仔摻佢兜起來用拋，鑊鏟都毋使停動著，差毋多會好咧，正落兜冰糖落去，金頭³又好食！係有這味，食加成碗飯仔，定著無問題！

粢粢仔，係客家人桌席項个招牌，年年節節、好事歪事，係

無看著這項，總試著無像樣樣仔。頭擺个粢粢仔，係用糯米飯放到掌油个舂白肚，一儕人舂、一儕人搥⁴，舂到又軟又韌，該下正將米麩摻糖粉攞共下來做底，歸大埕噴香个粢粢仔放到面頂，用兩枝筷仔準剪刀來剪，該就安到斷粢粢，大人細子相爭愛食，又好搞又好食！

係講著客家人个版圓，有大粒个有細粒个、有包料个有無包料个，有甜个有鹹个，隨在人擇，總做得擇著自家中意个。有一種接到大嫵隻，撇扁來中央又加撇一隻窟仔，焯浮撈起來，放入老薑嫵、烏糖水滾到醃醃个湯料肚，揸兜仔番豆末，攞等食，這就係一等有名个客家燻湯粢，也有人講安到牛搵水，有个人毋好食甜，摻粢粢仔抑係湯粢拿來搵燻肉味，該又係另外一種醃醃个鄉情味哩！

客家菜个好味緒，餻人又生趣，逐樣都恁好食，四炆四炒、客家炒肉、豬肺炒鹹酸甜、剁毛蟹醃、豬籠版、豬腸炒薑絲、鹹菜乾剁豬肉，三日三夜也講毋煞，口涎水溶溶跌，毋知愛仰結煞正好哪！

¹ 菜蓋：音 coi hab`；指所有蔬菜外層較老較黃的葉子。

² 燻：音 sau`；原用於燻絲，意為將蠶繭煮過再抽出蠶絲；此處意為入熱水鍋滾過再撈起。

³ 金頭：音 gim`teu`；看來像黃金一樣，又金又亮的樣子。

⁴ 搥：音 boi`；用手撥開或推開。

【伯公下】邱一帆原作

記得正上小學時節，在伯公下搞到斷烏¹無半夜，無想著莊項伯公祠個大門嘎分人鎖起來，共伴個一隻一隻像猴仔樣，攀過圍牆出去，單單伸偈一儕在伯公下大門肚。心煩腦急之下，乜想蹶上門鎖，攀過大門轉屋下去，一無注意，大門頂高像箭樣個細鐵精，好死毋死就撞爛衫褲刺入吾個左手腋下，阿姆哀哀過正得，黏邊血流血著，痛到耐毋得！好得大人看著遽遽同偈拗下來，送去分先生止血、消毒、包藥仔。記得該日暗晡當恬靜，無分大人罵，乜無食著大人專門為做毋著事個細人仔準備個「竹筱版」。這下，每擺看著左手腋下個一點疤，就想起小南埔伯公下個故事。

還記得伯公下圍牆脣項，有一頭牛眼樹，到地避暑就會打一杷²一把個牛眼，探入伯公下這片來。該係在伯公下搞寮個細人仔最好個零嗒，較高個人伸手就摘得著，較矮個人就愛練會爬牆蹶樹伶俐個功夫，無斯，正經會搶毋著來食！食伸個牛眼核，毋會打爽，搞伴仔³會拿來做傾掙搞，講也奇怪，仰會搞到有意有思！

¹ 斷烏：音 ton' vu'；天黑。

² 一把：音 id' pa'；一把或一串，果實連枝葉成串的稱呼。

³ 搞伴仔：音 gau' pan' e'；玩伴。

伯公個後背有一頭香花，厥個名仔聽講安到——夜來香，到地開花個時節，斷烏開始就會散放醜醜個香氣。伯公下貪搞個細人仔，總會帶等香味轉屋下，該時節，歸莊仔個人當像就鼻得著該夜來香味。

伯公下，係偈做細人仔時節搞寮個所在。逐日放學，小南埔莊項個細人仔打紙擲仔、射樹乳仔、搞傾掙⁴，大體仔就會行到伯公下。麼人較會搞、麼人較慧當⁵、麼人較奸宰？在搞個過程全全展現出來，搞伴仔目金金，伯公乜看現現。偈輒常恁想，係講童年係一齣比賽輸贏個戲，莊項個伯公下，就係盡打眼個舞臺。舞臺項無刀光劍影，淨有紙擲仔、樹乳仔、傾掙還有搞伴仔；舞臺項無血流血著個場面，但係有緊張、刺激個心情；舞臺項無刻情個評審，淨有笑微微仔個伯公，永久，深深刻在童年個畫面裡肚。

伯公下係偈童年重要個舞臺，所有在舞臺項演出過個人，偈還記得：共綱個搞伴仔，隔壁武頓個阿戊伯公當虔誠奉祀清瘦個伯公，慈祥個阿戊伯婆晒鹹菜個身影，輒常食酒醉講心事個阿富伯……，全全還留在吾個印象裡肚。年紀緊來緊大，恁著伯公下，就恁起童年時節；恁起莊項，恁起自家個莊項人。這下，小南埔莊項個伯公下既經無圍牆、無大門，乜無細人仔在該停跔搞寮。毋過，還做得看著莊項人帶等自家個子女，過年過節在該敬伯公。

⁴ 傾掙：音 kin' kang'；玻璃珠、彈珠。

⁵ 慧當：音 ngong dong；傻憨。